

## ﴿ KHUTBAH 2 ﴾

### HARTA YANG DIWAJIBKAN ZAKAT

Dr. Yusof Jasmin @ Joseph Gimbad

الْحَمْدُ لِلَّهِ الْقَائِلِ:

خُذْ مِنْ أَمْوَالِهِمْ صَدَقَةً تُطَهِّرُهُمْ وَتُزَكِّيهِمْ بِهَا وَصَلِّ عَلَيْهِمْ إِنَّ صَلَاتَكَ

سَكَنٌ لَهُمْ وَاللَّهُ سَمِيعٌ عَلِيمٌ ﴿١٣﴾

أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ شَهَادَةٌ تُنَجِّي قَائِلَهَا مِنْ  
عَذَابِ النَّارِ وَأَشْهَدُ أَنَّ سَيِّدَنَا وَنَبِيَّنَا مُحَمَّدًا عَبْدُهُ وَرَسُولُهُ، اللَّهُمَّ صَلِّ  
وَسَلِّمْ وَبَارِكْ عَلَى سَيِّدِنَا مُحَمَّدٍ وَعَلَى آلِهِ وَأَصْحَابِهِ وَالتَّابِعِينَ لَهُمْ بِإِحْسَانٍ  
إِلَى يَوْمِ الدِّينِ.

أَمَّا بَعْدُ، فَيَا أَيُّهَا الْمُؤْمِنُونَ أُوصِيكُمْ وَإِيَّايَ بِتَقْوَى اللَّهِ فَقَدْ فَازَ الْمُتَّقُونَ.  
وَاتَّقُوا اللَّهَ وَاعْلَمُوا أَنَّ اللَّهَ مَعَ الْمُتَّقِينَ.

Sidang Jemaah Yang Dirahmati Allah....

Terlebih dahulu khatib ingin berwasiat kepada diri sendiri dan para jemaah sekalian agar sentiasa meningkatkan ketaqwaan kepada Allah dengan beramal soleh dan mengerjakan segala perintah-Nya serta meninggalkan segala larangan-

Nya agar kita mendapat kebahagiaan di dunia dan di akhirat. Allah s.w.t berfirman:

أَعُوذُ بِاللَّهِ مِنَ الشَّيْطَانِ الرَّجِيمِ

يَا أَيُّهَا الَّذِينَ ءَامَنُوا اتَّقُوا اللَّهَ حَقَّ تَقَاتِهِ ؕ وَلَا تَمُوتُنَّ إِلَّا وَأَنْتُمْ مُسْلِمُونَ ﴿١٠٢﴾

Maksudnya:

“Wahai orang-orang yang beriman bertakwalah kamu kepada Allah dengan sebenar-benar takwa dan janganlah kamu mati melainkan kamu dalam keadaan beragama Islam.”

(QS Ali-Imran [3] : 102)

**Kaum Muslimin Sidang Jumaat Yang Dirahmati Allah.....**

Dalam kesempatan pada kali ini, mimbar Jumaat akan membicarakan khutbah bertajuk “HARTA YANG DIWAJIBKAN ZAKAT.”

Sesungguhnya Islam tidak pernah menetapkan had jumlah atau had timbunan harta yang boleh dimiliki oleh seseorang, malah Islam sangat menggalakkan ummatnya mencari rezeki semampu mana yang ia boleh, asalkan saja pemiliknya mengeluarkan zakat dari harta tersebut, serta diperolehi dengan cara yang halal atau bertepatan dengan syariat Allah s.w.t.

Dari segi bahasa zakat bermaksud menyuburkan, membersihkan dan keberkatan. Allah s.w.t telah berfirman dalam surah al-Taubah:

أَعُوذُ بِاللَّهِ مِنَ الشَّيْطَانِ الرَّجِيمِ

خُذْ مِنْ أَمْوَالِهِمْ صَدَقَةً تُطَهِّرُهُمْ وَتُزَكِّيهِمْ بِهَا وَصَلِّ عَلَيْهِمْ إِنَّ صَلَاتَكَ

سَكَنٌ لَهُمْ وَاللَّهُ سَمِيعٌ عَلِيمٌ ﴿٩٠﴾

Maksudnya:

*“Ambillah (sebahagian) dari harta mereka menjadi sedekah (zakat) supaya dengannya engkau membersihkan mereka (dari dosa) dan mensucikan mereka (dari akhlak yang buruk) dan doakanlah untuk mereka, kerana sesungguhnya doa engkau itu menjadi kententeraman bagi mereka. Dan ingatlah Allah maha Mendengar, lagi maha Mengetahui.”*

(QS al-Taubah [9] : 103)

Berdasarkan kepada ayat al-Quran surah al-Taubah ini, maka para Fuqaha mendefinisikan zakat sebagai: *“Mengeluarkan sebahagian harta yang telah ditentukan, dari harta tertentu, pada waktu tertentu, dan dibahagikan kepada golongan tertentu”*. Ini bermaksud bahawa zakat yang bererti menyuburkan ini adalah mengeluarkan kadar tertentu dari harta kekayaan yang kita miliki apabila sampai masa atau haulnya yang tertentu untuk diagih-agihkan oleh agensi yang diberikan tanggungjawab kepada asnaf ataupun golongan tertentu yang telah dikenalpasti.

#### **Sidang Jemaah Yang Dirahmati Allah.....**

Umumnya diketahui bahawa harta kekayaan yang wajib dizakatkan seperti yang telah dibahas oleh para Fuqaha boleh dibahagikan kepada empat kelompok utama, kelompok pertama iaitu galian seperti emas dan perak, kelompok kedua ialah binatang ternakan seperti unta, lembu, kerbau dan kambing, kelompok ketiga tanam-tanaman, iaitu tanaman yang menjadi makanan asasi manusia seperti padi, gandum, jagung dan sebagainya, kelompok keempat ialah barang-barang perniagaan.

Kelompok harta kekayaan yang telah dibahas oleh para ulama ini, sudah meliputi segala jenis harta yang ada, hanya saja, pengelompokan ini agak umum dan memerlukan kepada perincian dan pentafsiran yang bersesuaian dengan perkembangan bentuk perekonomian khususnya bentuk-bentuk perniagaan semasa yang boleh mendatangkan kekayaan atau manfaat hidup kepada manusia serta disesuaikan dengan pengertian dan konsep harta kekayaan masa kini.

## Kaum Muslimin Sidang Jumaat Yang Dirahmati Allah.....

Untuk melihat perkara ini dengan lebih terperinci, lebih menyeluruh dan lebih tepat, kita perlu mempericikan semula tafsiran dan definisi harta kekayaan. Berdasarkan kepada pandangan para ulama terdahulu dan juga masa kini, harta kekayaan itu ialah sesuatu yang mempunyai nilai, boleh dimanfaatkan, boleh berkembang, boleh di “*tassarruf*” (تصرف) atau boleh digunakan dengan pelbagai matlamat serta menjadi kecenderungan kepada tabiat manusia.

Berdasarkan kepada pengertian ini, maka boleh kita simpulkan bahawa setiap sesuatu yang boleh kita jadikan sebagai mata pencarian serta dibenarkan oleh Syarak adalah wajib kita keluarkan zakat. Pengertian dan konsep ini lebih menepati hikmah pensyariatan zakat itu sendiri yang bukan sahaja menjadi sumber kewangan dalam Islam tetapi juga menjadi alat pengagihan kekayaan yang cekap dan penuh barokah dalam masyarakat. Ini bersesuaian dengan Firman Allah dalam surah al-Hasyr ayat 7:

أَعُوذُ بِاللَّهِ مِنَ الشَّيْطَانِ الرَّجِيمِ

مَا آفَاءَ اللَّهِ عَلَىٰ رَسُولِهِ مِنْ أَهْلِ الْقُرَىٰ فَلِلَّهِ وَلِلرَّسُولِ وَلِذِي الْقُرْبَىٰ  
وَالْيَتَامَىٰ وَالْمَسْكِينِ وَابْنِ السَّبِيلِ كَيْ لَا يَكُونَ دُولَةً بَيْنَ الْأَغْنِيَاءِ مِنْكُمْ  
وَمَا آتَاكُمُ الرَّسُولُ فَخُذُوهُ وَمَا نَهَاكُمْ عَنْهُ فَانْتَهُوا ۚ وَاتَّقُوا اللَّهَ ۖ إِنَّ اللَّهَ  
شَدِيدُ الْعِقَابِ

Maksudnya:

“Apa yang Allah kurniakan kepada Rasul-Nya (Muhammad) dari harta penduduk negeri, bandar atau desa dengan tidak berperang, maka adalah ia tertentu bagi Allah, dan bagi Rasulullah, dan bagi kaum kerabat (Rasulullah) dan anak-anak

*yatim dan orang-orang miskin, serta orang-orang musafir (yang keputusan perbelanjaan). (ketetapan yang demikian) supaya harta itu tidak hanya beredar di antara orang-orang kaya dari kalangan kamu dan apa jua perintah yang dibawa oleh Rasulullah (s.a.w) kepada kamu maka terimalah serta amalkan dan apa jua yang dilarangnya kamu melakukannya maka patuhilah larangannya dan bertakwalah kamu kepada Allah, Sesungguhnya Allah amatlah berat azab seksanya (bagi orang-orang yang melanggar perintahNya).”*

(QS al-Hasyr [59] : 7)

Pensyariatan zakat ke atas harta kekayaan ini memungkinkan harta kekayaan tersebut tidak hanya beredar dikalangan orang-orang kaya sahaja tetapi juga dapat dinikmati oleh keseluruhan ahli masyarakat. Untuk mencapai matlamat ini, para ulama dan ahli akademik dalam memikirkan Fiqh Zakat semasa telah merumus dan memperluaskan konsep harta kekayaan yang wajib dikeluarkan zakat.

Konsep harta yang telah digambarkan oleh para ulama terkemudian ini dan juga kajian-kajian yang dibuat oleh ahli akademik di universiti mempamerkan bahawa setiap harta kekayaan yang diusahakan oleh kita umat Islam ketika ini wajib dikeluarkan zakat. Ini memberi ruang kepada harta-harta yang kita usahakan sentiasa berkembang, bertambah dengan penuh keberkatan dan penuh kesucian sesuai dengan maksud zakat itu sendiri.

#### **Sidang Jemaah Yang Dimuliakan Sekalian.....**

Harta kita berupa emas dan perak, binatang ternakan, tanam-tanaman berupa bijirin yang menjadi makanan asasi manusia sudah jelas tuntutan zakat ke atasnya dan tidak perlu diperincikan lagi kerana para ulama sudah membahaskannya secara menyeluruh, namun apa yang perlu kita perincikan sekarang ini ialah sumber kekayaan lain yang kita miliki.

Berdasarkan kepada maksud harta kekayaan yang dinyatakan di awal tadi maka, boleh kita simpulkan bahawa setiap kekayaan atau harta yang menjadi sumber sara hidup dan pendapatan kita sama ada ianya berupa perniagaan, penggajian, mahupun sumber-sumber pendapatan lain seperti binatang ternakan, tanam-tanaman serta aset-aset berbentuk emas dan perak adalah wajib dikeluarkan zakat. Pendapat dan pandangan ini bersesuaian dengan pandangan para ulama terkemudian ini seperti ulama terkenal Dr. Yusof al-Qaradhawi dan juga oleh para ahli akademik.

Sekarang ini, pelbagai bentuk dan pelbagai kaedah perekonomian yang boleh kita dapati berlaku dalam dunia masa kini. Begitu juga halnya dengan bentuk perniagaan yang dilakukan oleh masyarakat Islam. Kesemua bentuk aktiviti ekonomi dan bentuk perniagaan itu, wajib dikenakan zakat asalkan sahaja aktiviti ekonomi atau perniagaan tersebut yang menjadi sumber pendapatan seseorang tidak bertentangan dengan Syariat Islam, ini kerana apapun bentuk ekonomi dan perniagaan yang kita hendak lakukan adalah sebenarnya merupakan sumber kekayaan yang boleh di “*tassaruf*” (تصرف) untuk keperluan hidup manusia di dunia ini. Kesemua sumber kekayaan itu pula menjadi kesukaan tabiat manusia untuk memilikinya.

Justeru itu, saya mengajak kepada sidang jemaah sekalian agar berusaha mempelbagaikan bentuk aktiviti ekonomi dan juga mengusahakan pelbagai kaedah dan pendekatan perniagaan supaya boleh kita memperbanyakkan sumber pendapatan yang boleh membangunkan sumber ekonomi umat Islam. Justeru, meningkatkan taraf hidup umat Islam disamping dapat mengeluarkan kehidupan umat Islam dari kongkongan dan belenggu kemiskinan, kerana dengan banyak dan pelbagai sumber ekonomi dan sumber pendapatan, memperbanyakkan jumlah pungutan zakat yang wajib kita keluarkan dari harta kekayaan tersebut.

### **Kaum Muslimin Sidang Jumaat Yang Dirahmati Allah.....**

Sebagai kesimpulannya, apapun sebenarnya bentuk aktiviti perekonomian atau muamalah yang dibenarkan oleh Syarak sama ada dalam bidang penternakan, pertanian, perlombongan, perniagaan atau apa-apa bentuk muamalah yang akan membentuk atau bertukar dalam bentuk nilai berupa emas, perak atau sandaran nilai seperti wang ringgit maka kesemuanya itu adalah wajib kita keluarkan zakatnya, sebaik sahaja mencukupi syarat-syarat yang mewajibkan zakat, terutama dari segi nisabnya iaitu jumlah terkumpul pendapatan yang kita perolehi dari setiap kali penuaiannya atau mencukupi nisabnya pada setiap satu tahun pusingan.

### **Kaum Muslimin Sidang Jumaat Yang Dirahmati Allah.....**

Adalah menjadi cita-cita kita semuanya, sidang Jemaah untuk menjadi senang dan selesa dalam kehidupan ini, dengan erti kata yang lain, kita mahu segala kehendak dalam kehidupan kita dapat kita penuhi, oleh itu saya mengajak sidang jemaah sekalian supaya kita berusaha seikhlasnya dan sesungguhnya dengan tujuan supaya kita dapat melaksanakan ibadah zakat yang sememangnya dituntut dan difardhukan oleh Allah s.w.t kepada kita. Allah s.w.t mengingatkan kita dalam surah al-Baqarah supaya kita berusaha dan menginfakkan harta kita, kerana sesungguhnya infak seseorang itu di jalan Allah akan diberikan ganjaran yang berlipat kali ganda.

Allah s.w.t berfirman:

أَعُوذُ بِاللَّهِ مِنَ الشَّيْطَانِ الرَّجِيمِ  
مَثَلُ الَّذِينَ يُنْفِقُونَ أَمْوَالَهُمْ فِي سَبِيلِ اللَّهِ كَمَثَلِ حَبَّةٍ أَنْبَتَتْ سَبْعَ  
سَنَابِلَ فِي كُلِّ سُنبُلَةٍ مِائَةٌ حَبَّةٌ وَاللَّهُ يُضْعِفُ لِمَنْ يَشَاءُ وَاللَّهُ وَاسِعٌ

عَلِيمٌ

Maksudnya:

“Bandingan (derma) orang-orang yang membelanjakan hartanya pada jalan Allah, ialah sama seperti sebiji benih yang tumbuh menerbitkan tujuh tangkai; tiap-tiap tangkai itu pula mengandung seratus biji. dan (ingatlah), Allah akan melipatgandakan pahala bagi sesiapa yang dikehendakiNya, dan Allah Maha Luas (rahmat) kurniaNya, lagi meliputi ilmu pengetahuanNya.”

(QS al-Baqarah [2] : 261)

بَارِكْ اللَّهُ لِي وَلَكُمْ بِالْقُرْآنِ الْعَظِيمِ، وَنَفَعَنِي وَإِيَّاكُمْ بِمَا فِيهِ مِنَ الْآيَاتِ  
وَالذِّكْرِ الْحَكِيمِ، وَتَقَبَّلَ مِنِّي وَمِنْكُمْ تِلَاوَتَهُ إِنَّهُ هُوَ السَّمِيعُ الْعَلِيمُ، أَقُولُ  
قَوْلِي هَذَا وَأَسْتَغْفِرُ اللَّهَ الْعَظِيمَ لِي وَلَكُمْ، وَلِسَائِرِ الْمُسْلِمِينَ وَالْمُسْلِمَاتِ،  
وَالْمُؤْمِنِينَ وَالْمُؤْمِنَاتِ، فَاسْتَغْفِرُوهُ فَيَا فَوْزَ الْمُسْتَغْفِرِينَ وَيَا نَجَاةَ التَّائِبِينَ.